

四庫全書

集部

欽定四庫全書

集部  
宗伯集卷二

詳校官中書臣沈鳳輝

侍讀臣孫球覆勘

總校官編修臣王燕緒

校對官庶子臣鄒奕孝

謄錄監生臣顧裕涇

欽定四庫全書

集部六

宗伯集

別集類五

明

提要

臣等謹案宗伯集十卷明孫繼臯撰繼臯字

以德無錫人萬曆甲戌進士第一人歷官至

吏部侍郎當陳太后梓宮發引時神宗稱疾

不肯送繼臯疏爭忤旨及三殿災大臣自陳

皆慰留獨繼臯致仕去後追贈禮部尚書此

編題曰宗伯集從所贈官也凡雜文九卷詩一卷第二卷末有其子源文跋語稱其父生平不敢自居於名以故諫草都焚篋中祇存辭疏十八又求得其三其留中者無從覓稿即其他著述亦多不存今所刻碑銘志傳之文皆源文雜得之其子若孫暨朽緘敗扇與行於世者云云故集中所錄多應制及酬贈之作然當繼臯之時士習佻而文體亦弊七

子之風未艾三表之焰方新或棘句鈎章或  
矜竒弔詭操觚者出此入彼大抵隨波而靡  
繼臯詩文獨雍容恬雅有承平臺閣之遺風  
亦可謂不移於俗矣乾隆四十五年三月恭  
校上

總纂官臣紀昀臣陸錫熊臣孫士毅

總校官臣陸費墀

金史口口口

提要

欽定四庫全書

宗伯集卷一

明 孫繼皋 撰

冊文

昭妃冊文

皇帝制曰朕恭承慈訓式叙彝倫惟王化始於宜家既  
肇建中宮之位而壹政資於多助用敷求內職之良名  
號攸崇典章具在咨爾劉氏柔嘉為性貞靜自持禮度

夙嫻動有珩璜之節言容純備行符圖史之規爰副長  
樂之簡掄俾翼坤寧之教範茲特封爾為昭妃象應四  
星麗紫垣而耀彩榮先九御煒彤管以流芳服此寵光  
迪惟淑慎尚祇勤於夙夜用集慶於家邦欽哉

宜妃冊文

皇帝制曰化先閨闈式資協贊之良禮重宗祧宜廣繼  
承之道爰率備官之茂典載頒叙進之明恩光我壺儀  
亶惟邦媛咨爾楊氏儲祥令族毓粹中州端良合法相



之徵窈窕副好逑之選徽容有曄已參景曜于軒龍懿  
號所加宜亞聲華于綸翟茲特封爾為宜妃椒塗敷秀  
聿昭四德之休蘭殿承芬用佐二南之化尚其祇服勿替  
執勤勉遵圖史之規丕行本支之慶欽哉

誥命

少傅兼太子太傅禮部尚書武英殿大學士張四

維誥命

奉天承運皇帝制曰朕精求理道眷倚名賢冀紹修謨

烈之隆用敷責基圖之重帝賚予弼官惟其人二公宣  
寅亮之勲三載奏奮庸之績宜頒異數以示崇恩咨爾  
具官涵經世之才猷抱佐王之道術有真行閱深之識  
而出以忱恂有端方直亮之操而將之謹恪簡自肅祖  
翼我先皇史局宮僚身久依於日月佐銓長翰望雅重  
手機衡洎於朕躬爰立爾相自端尹踐中台之席由秩  
宗躋亞保之班爾乃感特達之深知罄生平之積蓄敷  
陳堯舜若謂吾君為能殫竭謀猷猶曰我后之德以正

色表儀乎羣辟以和衷參決乎萬幾睠此乾坤之清夷  
良由左右之弼直膚功來上朕志允諧孤卿加帝傳之  
銜四輔晉佐師之秩茂延世賞申需廷綸仍授爾階光  
祿大夫勲柱國錫之誥命於戲朕方詢事以考言故嘉  
乃丕績朕甚尊師而重傳故陟爾穹階尚其肩鼎足以  
承君秉丹心而率職唯德唯義道益進于保躬作醴作  
羹忠無忘于訓志登闕上治光輔中興欽哉

制曰朕惟樞機之佐夙夜在公固上臣之事君不有其

家亦中閨之有淑相在爾室肆舉懋功之典並疏從爵之恩國有彝章今為異數爾具官妻封一品夫人王氏誕秀高華儷芳名碩柔嘉自性德咸中乎珩璜靜正為儀動一遵夫圖史春茲內美襄我元僚酬寅亮之崇勳霈申重之寵命是用仍封爾為一品夫人度表山河增賁六珈之飾徽揚江漢祇承三錫之榮

制曰自古帝王之佐社稷之臣其出也有為而功德所被不止一民一物之微其生也有自而善祥所鍾不止

一世二世之積故恩禮特隆於宰輔而寵褒覃及其曾  
先爾贈光祿大夫少保兼太子太保禮部尚書武英殿  
大學士張寧乃具官四維之曾祖父長者之心仁人其  
行曰唯孝友於兄弟有善於身不求聞達於家邦無名  
於世百年所積三葉而昌若金作礪而旱作霖允資弼  
鉉如水有源而木有本宜霈休綸是用加贈爾具官宮  
階峻秩彌彰天錫之隆厚祉餘休益篤雲仍之祐

制曰國家尊禮元僚寵頒異數凡追崇其上世得並逮

于曾闡矧從一居貞亮清白之節保孤永祀開熾昌之  
圖在古不磨于今為烈爾贈一品夫人雷氏乃具官之  
曾祖母夙稟慈訓來歸德門中道而失所天矢心則有  
如日撫一綫之脉更子而孫堅兩髦之儀繫女而士眷  
經邦之偉績嘉啓祚之弘功是用仍贈爾為一品夫人  
懿範如新誦栢舟而慕義明恩未艾紀彤管以流芳  
制曰夫幽潛之士厚積在躬而慶常流於後變理之臣  
弘施在世而源常濬於先故國家申眷于宗工則恩數

特隆于祖考非獨明有始之義亦俾行無疆之休爾贈  
官張誼乃具官四維之祖父天子敦龐力行孝弟與物  
無競有仁人長者之風直躬而行無靡麗紛華之習蓄  
其善祉開爾聞孫弼子一人如巨川之作楫興於再世  
殆高山之出雲宜有顯褒以彰明德是用贈爾如具官  
秩崇上佐丕揚祖廟之光恩責重原永篤相門之慶  
制曰夫誦共姜之詩則慕其烈讀令伯之表則哀其情  
然共無聞於立孤而李弗有於追顯孰與我奮庸之佐

兼隆夫烝畀之儀亮節彌光鴻名並久爾贈一品夫人  
解氏乃具官之祖母早以淑媛歸於哲人違偕老之期  
艱難備歷矢靡他之誓志操逾堅既翼子以貽孫肆承  
家而秉國懋著上臣之偉績丕揚先世之徽音是用仍  
贈爾為一品夫人風教是維為信史必傳之事霑恩斯  
渥慰聞孫欲報之情

制曰明王立政不惟其官惟其人積善降祥不於其身  
於其子蓋帝賚良弼非偶而天祐善人靡常若乃身居



樞筦之司亦有父逮鼎鐘之養造化所篤朝廷罕倚爾  
乃具官之父樸茂居貞慈祥好施誠心直道追三代之  
遺風達德高年望百齡之厚祉誕啓禹臯之佐弘敷堯  
舜之猷於身親見其成當世陰蒙其賜載疇義訓申錫  
恩綸是用封爾如具官杖屨優游為天下之大老簪纓  
烏奕極人間之至榮益迓天庥遙觀相業

制曰母之愛子靡弗知勞而身顯則教益彰子之愛親  
靡弗知慕而位高則思愈切肆國家有善推之典而臣

子無不盡之情至我輔相之元僚尤極褒崇之異數爾  
王氏乃具官之母天子靜貞性含慈惠言為姆訓揚列  
傳之徽音行合婦儀肅名家之禮法實相夫而迪子爰  
作弼以匡君經綸見機杼之遺調燮餘栝棬之戀宜中  
渥寵以報劬勞是用仍贈爾為一品夫人九原焜耀彰  
昊天罔極之恩三錫駢蕃慰大孝終身之慕懿靈不昧  
明命其承

少保兼太子太保禮部尚書武英殿大學士張四

維并妻誥命一道

制曰朕尊親立愛錫命疏恩矧茲小大之臣咸被休嘉  
之慶矧貳公弼亮式賴忠賢而一德寅恭克襄孝治不  
有寵褒之渥曷彰眷倚之懷咨爾具官張四維名世偉  
人熙朝宿望有博達淵潛之識而本之忱恂有端方直  
亮之操而將以勤恪自服官於史局已夙膺乎英聲游  
陟宮僚多講幄論思之益升華翰署冠文學侍從之班  
旋躋銓部之貳卿克佐建邦之六典先皇帝用以遺朕

俾尸儲闈余一人勞於求賢延登揆路感酬知遇弘宣  
承辟之猷殫竭忠貞式展經邦之畧運陶甄於鼎鉉罄  
謀斷於樞機譽實兼隆勲勞茂著允諧朕志庸示眷酬  
四輔晉秩於春官孤卿加銜於殿學茲以覃恩授爾階  
光祿大夫錫之誥命於戲三少之官于今已備五臣之  
烈自古稱隆卿其勿替初忱予以追蹤往哲股肱一體  
朕將賡喜起之歌師保同心爾益效變調之績敬乃有  
位永孚于休欽哉

制曰賚余良弼眷惟名世之賢宜其家人資于好逮之  
助恩禮既隆於朝宁光華亦逮于閨闈厥有上夔用章  
內範爾具官張四維妻累封淑人王氏克配君子卓為  
女師訓服衿鞶肅名家之禮度動遵榘矱揚列傳之音  
徽繫茲相業之光昭實賴壺儀之淑慎宜從崇爵申錫  
榮名是用加封爾為一品夫人禕翟斯煌祇荷鴻休之  
薦被絲綸有赫式嘉象服之維宜

制曰朕惟生賢為國應千載之昌期積善于家行百年

之餘慶蓄厚者其施遠功盛者其報隆粵有特恩光于  
奕世爾張寧乃具官四維之曾祖父性稟醇良行敦孝  
友含貞抱璞夙高長者之評委社儲庥遠篤曾孫之祜  
相業方茂先德彌昌賴酒醴麩蘖之資重水木本原之  
念茲用贈爾具官於戲四世而昌垂令名於不朽九原  
可作服峻秩以維新

制曰朕觀圖史所載閨闈之良或恒一德以終身而未  
必自于蚤歲或罹百憂以撫子而未必亢于厥宗惟備

美以流芳宜曠世而滋顯爾雷氏乃具官四維之曾祖  
母提身貞淑秉性幽閒顧蚤違于所天誓每嚴于皎日  
既鞠孤子復撫孤孫不辭夙夜之拮据用嗣春秋之饋  
享睠予輔弼有懷啓祚之功念爾艱貞宜荷追崇之典  
是用贈爾為一品夫人懿則如存尚重膺于渥澤嘉名  
肇錫庶永庇于雲仍

制曰朕弘敷慶澤崇答臣僚勤相國家既獎其贊襄之  
績纘戎祖考宜慰其似續之思爰有顯褒以彰盛典爾

贈通議大夫吏部左侍郎兼翰林院學士張誼乃具官  
四維之祖父宅心仁厚秉性樸醇悅禮敦詩德公之遺  
安畎畝履仁蹈義太丘之表正鄉閭是開繩武之賢作  
我調元之佐惟孫謀之克紹知祖德之垂芳茲特加贈  
爾具官申命自天寵數極中朝之盛嘉亨在廟宗祊  
延奕葉之光

制曰家有世德流光施及于子孫國有殊恩命秩兼隆  
于祖妣禮雖或限于令典義則可起以至情惟我重臣



被茲異數爾贈淑人王氏乃具官之前祖母提躬令淑  
作配善良樹懿範于閨闈遺善祥于胤祚雖貽孫翼子  
弗在其身而積功累仁乃昌厥後瞻中台之茂績遡奕  
世之徽音是用加贈爾為一品夫人榮名並烈祖之光  
九原增賁靈爽篤孝孫之祐百世彌昌

制曰孫謀貽燕雖本祖功門閥肇興亦資內德故王母  
有介福之寵俾後賢遂報本之思緣情而推惟禮之稱  
爾贈淑人解氏乃具官之祖母幽閒夙稟純懿性成矢

志靡他不愧共姜之烈保孤能訓式勤文伯之規傳子而孫益昌且熾匪賴起家之厚澤曷成體國之崇勲是用加贈爾為一品夫人天祐宗祔世篤艱貞之節國推慶渥光昭垂裕之休

制曰眷我邦家碩輔忠孝兼資潤色皇猷茂佐中天之運瞻依庭訓有懷愛日之誠宜推錫類之隆恩用慰尊親之至願爾累封具官允齡乃具官之父慈祥樂善醇樸居貞雅尚清修人共推其長厚高年茂德天乃錫之

壽康篤啓嗣賢躋登鼎鉉調元贊化謨謀本自其家傳  
濟美承庥勲業豈殊于已出爰酬善誨晉陟穹階茲特  
加封爾具官於戲惟德致福䟽榮特邁乎等倫移孝  
作忠詒穀無忘于終始服茲休命益介純禧

制曰朕敷慶羣工推及其母雖緣情而錫類實因分以  
致隆有若元僚素承慈訓輔弼之勲既著劬勞之報宜  
崇爾贈淑人王氏乃具官之母動合女師儀為邦媛相  
夫順正持儆戒以相成治內明章秉靜恭而作範玉成

哲嗣晉位台司黼藻經綸教未忘于機杼鹽梅調燮澤  
尚戀于栝捲宜薦褒嘉以彰聖善是用加贈爾為一品  
夫人寵章晉錫永貽彤史之芳顯號鼎新用作玄扃之  
賁

少傅兼太子太傅禮部尚書建極殿大學士許國  
并妻誥命

制曰朕獨炳化原重新政典惟潤色裁成之助屬同心  
輔相之賢國憲朝章咸歸黼藻神謨聖烈具載縹緗忠

勸茂隆眷酬滋渥咨爾少傅兼太子太傅建極殿大學  
士許國大儒全學名佐上才浩博淵宏涵匡時之道術  
端方直亮樹表世之風猷以公望侍經幃弘資啓沃以  
老成登宰席益殫謨謀參決弛張身荷天工帝載分明  
枉直力回世道人心諳禮樂刑政之宜綜述作文章之  
任當朕垂衣端拱實資崇職以董百官繫卿領袖班聯  
恒竭乃猷以諧三事勲奏于作弼提衡之日而功多于  
尹儲載筆之年斟酌百王名符駿業經綸一代法本鴻

裁是惟致太平之書允禪顧問有如條故事而上行倚  
平章可陟位于孤卿兼進班于近殿載數寵告用答成  
勞茲特授爾階光祿大夫勲柱國錫之誥命於戲虞帝  
命官百揆兼于大禹周王訓治六官制自姬公尚其虔  
秉同寅勤宣令甲惟德惟義以詔王躬是訓是行以扶  
皇極欽哉

制曰朕申布典章嘉台臣之潤色永懷圖史慕哲媛之  
徽音肆獎答元功咸歸內美而愍揚懿範不受重褒爾

具官許國妻累贈一品夫人汪氏秉德靜莊作速名碩追  
贈佩鳴環之助雅著令儀春當樞秉軸之勞彌宣往勛  
胡弗偕老竟此潛輝絲綸延禕翟之充泉壤閱河山之  
度是用仍贈爾為一品夫人榮歆三命埒顯爵于黃扉  
化行二南紀芳華于彤管

制曰國家有大制作應重熙累洽之期臣子有大勲勞  
徵積功累仁之效恩特隆于近輔德必邇其曾先爾累  
贈光祿大夫少保兼太子太保禮部尚書武英殿大學

士許闕乃具官國之曾祖父雅志好修終懷高蹈戢身而隱徜徉不讓幽人跋履而遊閭里稱爲儒者流光四世而遙實啟鹽梅之佐晉秩六官之首益彰統緒之遺是用加贈爾具官報崇本始百年善慶猶新祐篤雲仍三錫恩華未艾

制曰國崇寅亮之勳三孤並秩家叶和鳴之兆五世將昌宰席思蕃曾闈慶洽爾贈一品夫人田氏乃具官許國之曾祖母身持雅操力相清修佐高隱于徵君人稱齊



德播幽芳于列女天與發祥瓜瓞肇以綿延鹽梅倚其  
調燮惟啓祚之淵源甚遠肆揚徽之渙汗彌新是用仍  
贈爾為一品夫人寵極內階益增華於宅窳福流中壺  
恒錫祉于本支

制曰帝王以繼述為達孝而毗德恒待于臣宰執以贊  
襄為大忠而顯名恒歸于父偉茲國典美爾庭聞爾累  
贈光祿大夫少保兼太子太保禮部尚書武英殿大學士  
許闕乃具官之父個儻多奇溫良有讓躬萬石之行不出

家而教成賡五噫之歌一出闕而身隱是父是子業在  
遺經有君有臣政存方策人有技若已有技保我子孫  
吾不為吾子必為施于邦國是用加贈爾具官功懋  
懋賞相門垂堂構之光得全全昌禰廟勒鼎彝之伐

制曰朕申令庶官推功上宰嘉其增休于前政則有顯  
褒念其稟訓于先慈則加崇卹爾累贈一品夫人汪氏  
乃具官之母幽閒稟性淑慎提躬隱佐冥鴻德尚垂于  
荆布祥開鳴鳳緒克紹于箕裘皇猷藉黼黻之華聖善

餘機絲之誨易三公以一日風木悲深極九我于三年  
慕我思切是用贈爾為一品夫人丕揚相業報昊天罔  
極之恩叠被恩章慰大孝終身之慕

勅命

南京兵部武庫司主事張正鵠父母并妻勅命

勅曰朕晉號慈闈頒綸庶案所以廣湛恩同休慶也其  
有夙構家艱而已復還朝列明詔具存豈有愛哉爾具  
官正鵠策名高第通籍太常陟官留都列屬司馬而恭

勤清敏蔚乎有聞樞齋之司裨益不細茲如詔指授爾  
階承德郎錫之勅命爾今改秩秋曹民命是寄尚以詰  
戎之慮為敬獄之圖惟爾之能庶朕以懌

勅曰良士好修賢妻善助故禮隆於敵體而恩逮于俱  
榮是本彝章亦闕勸典爾原任具官妻封孺人周氏毓  
貞官闕媿德儒門婉有婦儀閑於閭範爾夫以清勤著  
譽爾實裒之是用封爾為安人祇承再錫之華益懋相  
成之義

勅曰士有富文學砥行立名然無祿早世而其遺胤不  
絕如帶此天道之所隱也俾熾而昌若合於損益之理  
馬爾生員贈文林郎太常寺博士張桐乃具官正鵠之  
父篤志好古慕為純儒而不長厥年遽見其止幸哉有  
子起稱部郎愍冊方新庶用以慰茲加贈爾承德郎南  
京兵部武庫司主事生也有涯歿而無憾

勅曰朕歲遣使者分行天下覽觀風俗其有閭閻之間  
貞婦可褒表者具以事聞旌異如制矧亮節一德迪子

於成居朕卽列者乎則需恩豈有量哉爾封太孺人諸氏乃具官之母本以女士歸於儒英中道相捐矢心靡慝晚沾祿養優游以終爾於往者居者俱無餘憾已茲贈爾為安人永流彤管之輝長作玄扃之賁

表

百官賀仁聖懿安皇太后表

伏以慈謀協豫式隆主配之求孝理重光載舉尊親之典侈鴻名於有永垂燕翼於無窮祐篤三靈懽騰萬國

恭惟仁聖懿安皇太后陛下幽閒貞靜光大含弘相穆  
考於至寧心存儆戒啓今皇於初服化衍雍熙更勤廟  
社之深圖爰命宮闈之肇建擇賢儷聖登太妣而太任  
之教彌章治國觀家正長秋而長樂之顏益慰矧兩宮  
之媿美宜五位之推崇穆卜良辰重申大號黃金字燦  
宣寶冊以揚休翠羽儀開伏璇宮而展慶增賁彤闈之  
奉茂延紫極之禧蓋堯德蕩蕩以難名而舜心夔夔之  
愈慄永式家邦之範丕昭史筆之華臣等幸際明昌欣

逢盛美天門日麗拜瞻莫罄於階葵禁籞春遲承藉思  
依於葦草伏願福隨德厚壽與名齊養以九州椒寢時  
聞乎視膳備茲百順蘭房早遂乎含飴

命婦賀仁聖皇太后表

伏以化基宮閭治內儷治外而稱尊禮重宗祧長樂得  
長秋而行慶盈廷有爛含氣胥懽恭惟仁聖皇太后陞  
下貞順夙成肅雍允備雞鳴致傲陰毗穆穆之風膠木  
示慈誕發振振之瑞聖躬允資於啓佑母道聿顯其光



華德比珩璜名輝圖史屬者軫帝齡之方茂感風人之  
好逑謂萬福之原始諸匹配而二姓之好象彼乾坤慎  
選淑媛俾承宸御文王嘉止文母之福履彌綏太姒嬪  
京太任之徽音克嗣九有慶中闈之有主六宮仰慈極  
之增輝妾等幸際熙辰忻逢嘉禮祇深雀躍莫罄嵩呼  
伏願百世本支長奉含飴之慶萬年景命永承思媚之  
麻妾等無任懼忭之至

命婦賀慈聖皇太后表

伏以坤維貞靜承乾德以含光婦順明章繼母儀而協  
極化宣閨闈慶溢家邦恭惟慈聖皇太后陛下德蘊貞  
純性涵溫惠居惟循夫圖史動悉應夫歲規翼贊功深  
類塗山之佐大禹勛勞德茂同慶都之誕神堯長樂尊  
崇致養方隆於萬國洽陽嘉止卜祥爰儷乎一人主饋  
得賢承祧有賴襲休徵於莞篲表令範於椒蘭縟典告  
成徽音克嗣妾等幸叨壺教仰荷慈恩祇深懼忭之誠  
莫罄揄揚之悃伏願貺增視膳祉遂含飴蟄蟄繩繩百

世綿本支於有永皇皇穆穆萬年歌景命於無疆

命婦賀中宮箋

伏以紫掖升華肇啓二南之化彤庭渙命遍觀六禮之  
成慶溢寰區歡騰臣妾恭惟皇后殿下鍾祥令族毓粹  
神都質柔順以覩天德安貞而應地屬聖齡方茂來嬪  
有待於塗山乃天意攸鍾作合已占於渭涘肆協神謀  
之吉爰徵文定之祥禕曜光華星軒朗潤獻稔種而相  
祀春秋奉九廟之烝嘗羞脯粟以承懽左右致兩宮之

孝養聿章婦順允稱母儀象彼坤維配乾元而載物方  
之月彩儷日馭以中天永膺函夏之歸心茂迓長秋之  
介祉妾等幸際光華之旦獲從朝謁之班慶忭實深揄  
揚莫旣伏願化光壺政道贊皇風慶鍾乎麟趾螽斯穆  
穆皇皇益衍無疆之祚和徵于葛覃樛木雍雍肅肅恒  
培有美之祥

致語

兩宮宴會致語

伏以慶協慈闈寶冊鴻名昭百代祥開壽域瑤圖鶴算  
啓千齡尊崇同宇內之懽心宴樂極人間之盛事正韶  
華未老天顏有喜偏宜更化日初長景命無疆預祝最  
難逢良辰美景爭快睹綺席芳筵恭惟聖母仁聖懿安  
皇太后陛下得一以寧秉德建儀刑之極履正而順濟  
猷垂啓佑之圖聖母慈聖宣文皇太后陛下起塗山而  
相禹篤生克繼之賢嬪涓涖以興周誕育丕承之聖允  
矣兩宮媲美居然五位承懽恭惟皇上至聖至仁立愛

立敬念百方擁佑恩罔極以齊天思九我劬勞養無方  
而愛日適擇儷初成於縟典肆揚休載晉於徽稱普皇  
仁下詔彤墀介聖壽稱觴紫極鐘鳴禁裏雙扶鳳輦下  
天來彩戲階前百拜龍章呈日麗看宮花一萬樹萬樹  
曉風吹遍薦仙實三千年千年春色教成太液池管取  
作瑤池翠管銀瓊合奏宜春苑從教為閨苑黃鶯青鳥  
俱飛玉露瓊漿寶鼎分將御醞駝峯麟脯瑤盤擎出天  
廚可知天上神仙從此會安臻福壽端是女中堯舜繼

自今坐閱勲華臣等身處掖庭職叨法部幸沐二南之  
化多慚蕩蕩難名聊抒三祝之忱敢擬洋洋足聽御筵  
雙敬奉慈闈聖主尊親願不違禁樹千層迴鳳輦宮雲  
五色護龍衣鶯聲弄曲歌全蒞花氣侵杯酒漸微共祝  
含飴還介祉年年長得頌恩暉

謝表

丁丑進士謝恩表

伏以彤墀賜對幸瞻上聖之虛懷玉陛敷言濫被清時

之盛選遇主深慚于蹇劣致身胥慶于遭逢天祐文明  
人沾渥澤恭惟皇帝陛下法天行健稽古右文負宸凝  
旒德政每勤於旻日細旃廣廈譚經不輟於祁寒普菁  
莪之化以作人弘鞮鐸之規而取士人爭磨濯世會雍  
熙方允升於大猷乃猶切于清問臨軒而策究心乎國  
計民生側席以思加意於官常武備斯蓋已治而憂未  
治故欲有為以享無為詎期草野之敷陳獲荷楓宸之  
採擇臚傳內殿宴啓南宮色燦冠袍特拜尚方之賜榮



頌鏗楮均叨左藏之珍非啻用其言而顯其身抑將循  
其名而責其實思蕃晉錫式增士類之光道協泰文益  
顯儒風之振若為稱塞徒有凌兢臣等敢不彌堅初進  
之心勉責後來之效先資成信誓終始以勿攜補過盡  
忠期夙宵而匪懈庶以明君逸臣勞之義亦庸答天高  
地厚之仁伏願純心任賢遜志典學祖虞舜之兢業聿收  
亮采之功師文王之緝熙直擬顯謨之盛臣等無任瞻  
天仰聖激切屏營之至

庚辰進士謝恩表

伏以聖主右文懿典重臨軒之策清朝通籍隆恩叨賜  
第之榮言揚畢慶於泰征禮遇深慚乎晉錫遭逢甚盛  
感戴難勝茲蓋伏遇皇帝陛下天啓神明日新聖敬尊  
親饗帝體仁孝以綏猷講學親賢本身心而立教備舉  
禮文之事弘開俊乂之途謂聖道洩於九疇而皇極妙  
於三德歷陳經訓深究化原闡御世之規欲以祛偏陂  
好惡求宜民之道思以善正直剛柔賜一日之燕閒垂

九重之清問當神禹叙疇之日切姬王訪道之心方虞  
登對之難酬猥荷覽觀而並錄臚傳內殿宴錫南宮色  
燦冠袍特拜尚方之貺恩頒鎡楮均承左藏之珍風雲  
之感會非常雨露之沾濡更渥儒風丕振士類增光臣  
等敢不堅守先資勉圖後效惟忠惟孝雖溫飽以何心  
是訓是行庶光華之克覲並贊會歸之化少酬高厚之  
仁伏願兢業圖幾儉勤保大五福時斂益培湯穆之淳  
風萬邦以貞長享平康之盛治

擬駕幸文淵閣謝表

伏以綸扉地密清華依日月之光法駕天臨儀衛擁風  
雲之色惟賢君能有禮下之盛節在儒者以為曠古之  
奇逢喜動巖廊先生袍笏恭惟皇上神授當天生知作  
聖典學而經帷日御篤尚宗思道之誠咨政而便殿時  
詢邁殷后訪予之想乾綱獨總釐百度以維新震疊旁  
行輯九圍而丕式即號為臯夔伊傅莫能望其下風豈  
凡為師保疑丞所得陪其末議何期聖德特溥宸光謂

內閣創自文皇位崇鼎鉉而閣臣首乎羣辟職轉鈞樞  
爰從臨御之餘式枉文淵之駕觀翠華之迢遞恍飛動  
於雲間驚清蹕之傳呼忽降從於天上望塵瞻拜威顏  
咫尺以非遙侍輦從容慰諭再三而特至匪啻誇宸游  
之逸豫義存明目達聰雖名矚秘閣之清嚴禮原用上  
敬下飛龍顯象初疑帝所之夢游舞獸均懽終荷仙輿  
之親駐彼慶厯引輔臣於天章非同賜幸而降平閱書  
史於秘省無取疇咨卓矣清朝昭哉曠典動書左史永

傳泰道之交恩播外廷共慶謙光之照蓋聖人之舉動  
非常而儒道之遭逢甚盛也臣等位司密勿才乏贊襄  
近耿光於九天處慚非據沐恩數於三接榮反為憂敢  
不屬冰淵惕厲之心對天日照臨之鑒曰為先後曰為  
左右不忘夙夜以孜孜國爾忘家公爾忘私永佩王臣  
之蹇蹇伏願聖不自聖謙而愈謙精神交通不獨尊崇  
於禮貌廉陛不隔常如接見乎師儒則帝德罔愆行駕  
今而軼古皇猷允塞終咸五以登三矣臣等無任瞻天

仰聖激切屏營之至

擬唐以御製金鏡述頌示侍臣謝表

貞觀二年

貞觀二年某月某日具官臣某等伏蒙聖恩頌示御製金鏡述謹奉表稱謝者伏以明王制治瑤編洪稽古之猷聖主覃恩寶訓廣敷言之益妙述既隆於一代虛懷復切於交修受帙知榮拊躬增媿臣等誠懼誠忤稽首頓首上言切惟帝王成盛治必資千古之緒言臣子効微忠恒藉一人之錫類故道詢疇範周王願治惟勤而

歌賡明良虞帝交儆彌切自秦不師古空留壁裏之遺  
編迨漢不事書蓋沿馬上之餘習武帝訪求雖遍那思  
鑒以為師宣宗章奏徒勤未見頒之作式事如有待道  
不虛行茲蓋伏遇皇帝陛下天挺英資日新帝德布昭  
聖武輿圖弘一統之規丕殫皇仁大業奠萬年之固從  
諫擴轉圜之量雖小不遺用人妙器使之公無微不錄  
蓋愛民疊疊治已軼於先王而望道孜孜心不忘於今  
日牙籤晴日麗刻意校讐錦軸彩雲分留心編緝事闕



國體撮其要而析其詳道切君身提其綱而悉其目鸞  
迴鳳者誠哉經世之英華璧合珠聯允矣安邦之訓典  
鑑取人為善之義踵述而不作之名用命為金鏡之述  
以成書爰頒諸近侍之臣以廣惠琅函燦爛曉來閭闔  
生寒寶墨淋漓春到縹緗動色捧歸薇省爭看誥訓之  
章伏讀蘭臺驚睹典謨之筆將永以傳之世世抑持以  
示乎人人是誠天子勸忠之大端夫亦聖人懋德之明  
驗也伏念臣位列章縫班聯侍御塵心未拭慚無磨鍊

之才暗質初開愧乏光明之業敢不矢心潤色竭力宣揚視製如謨儆戒不忘於夙夜對言如鏡開陳無替於始終於以光聖德於無疆且以煥王言於有赫伏願聖不自聖謙而又謙謂古人為必可師探意緒於編摩之外謂古治為必可復挹精神於夢寐之中財四三五六五帝永為後人著述之端三十世八百年應作奕世明良之鏡矣臣無任瞻天仰聖激切屏營之至謹奉表稱謝以聞

擬宋王曾詮錄古先聖賢六十事繪圖以獻上降  
詔褒美命禁署月進二十軸仍鏤板印賜近臣

謝表

天聖元年

天聖元年某月某日具官臣等伏蒙聖恩以輔臣王曾  
所獻古先聖賢六十事圖既降詔褒美命禁署月進二  
十軸仍鏤板印賜謹奉表稱謝者伏以賢臣翊運瑤圖  
弘稽古之猷聖主當陽玉詔廣納言之益睿覽既屢於  
宸御王綸復布於臣隣捧帙知榮撫躬增媿臣某等誠

懽誠忭稽首頓首上言竊惟帝王隆德業必師古昔之  
聖賢朝廷懋元良恒謹燕閒之禁暑雖堯舜禹湯文武  
之聖咸自得師即臯夔伊傅周召之賢並言法古日新  
時敏卓立芳規廷戒宮嚴丕昭懿範自謨弼之風既泯  
而憂勤之治遂衰臨政優游孰揖古人於夢寐坐朝懈  
怠誰知敬德於穆清金鑑之錄徒褒千秋何補太平之  
書日進五位奚裨况一人雖得於鑑觀而列侍未蒙於  
錫類事如有待道不虛行茲蓋伏遇皇帝陛下剛健中正

文武聖神問膳問安孝特隆於內寢不畜不殺仁常溢  
於遐方中夜止燒羊念念不忘乎茂對滿朝無指鹿人  
人咸服其公明蓋千古聖賢既以仰躋其駕而一時詮  
錄猶然俯納其忠繪成六十圖褒詔恍從丹鳳下月進  
二十軸溫綸還向紫扉來爰鏤之版以成書更賜之臣  
以廣惠牙籤初啓雲排閭闔曉生寒錦軸甫開日映縹  
緗春動色坐藜閣而清宵展卷俄驚見於二帝三王捧  
琅函而子夜還家欲永傳於千年萬祀此誠臣子逢時

之幸抑亦聖人懋德之徵也伏念臣某等職列章縫班  
聯侍御科名濫廁慚非王曾不媿之才圖籍叨承羞負  
皇上求賢之意讀經語如聞天語對格言若服聖言敢  
不矢志書紳盡心補袞發古先所未發聊闡素心陳今  
日所已陳畧輸丹悃務續百年之道統用開萬世之太  
平伏願聖不自聖謙而又謙得意忘言修德期於罔覺  
識心志象進學底於無疆則治烈鬼我永作後人之圖  
畫奇功卓越應成他日之刻鏤地久天長固金甌於億

載山凝川永綿玉歷於萬年矣臣無任瞻天仰聖激切  
屏營之至謹奉表稱謝以聞

擬輔臣以所撰大寶箴註進講賜銀八寶謝表

伏以惟幄敷陳古訓闡責難之益瓊瑤貢錫恩光昭受  
善之勤德業起于相規地天占其交泰榮生蠶軸色動  
簪紳臣某等誠惶誠恐稽首頓首上言竊惟帝王之大  
寶曰位位實艱難臣子之効忠以言言何容易慨黃虞  
下降皆繇茂德而亡猗李唐初興特用求言而烈太宗

持籙兢乎若隕深淵蘊古獻箴亟矣如雁覆轍俯仰古今之際覽觀治忽之源原公明之體合照同仁歎逸樂之流生哀召禍欲其去桀而去紂即宮室飲食聲色貨利之俱防望其為高而為文故慶賞刑威耳目聰明之備飭詞不煩而意自足言有盡而心無窮豈獨罄一時款款之忱亦宜垂萬代明明之鑒蓋君道主於憂勤勤則勞勞則有功而鞏苞桑之固抑國政隳於暇逸逸則惰惰則不振而貽復隍之虞在古多然于今宜慎恭惟



皇帝陛下英資穎特睿學光明敬天法祖勤民凝圖穆  
穆親賢遠奸去佞嗣服昭昭御藻親裁十二事之鴻銘  
日揭朝綱獨攬億萬年之大法風行治已躋于至康貞  
觀取望化全流于默運箴訓何裨顧臣之愚猶盛之懼  
念拘攣俗學即輔弼之任奚稱而掇拾前聞或芹曝之私  
可達遂忘其陋輒註斯箴句析條分泐畧依於訓詁言  
詮字釋事咸究其指歸取其明白易知俚詞並抹期於  
感發生懼已意兼施詎謂資九重天縱之明祇以發一

得愚衷之見寧知進講遽荷殊恩賜出尚方分揚州之  
三品頒從內帑集寰宇之八珍開函則合璧連珠燦一  
天之星斗入袖則握瑜懷瑾騰百丈之光華疇若予工  
能使川呈海現惟德其物應令澤潤山輝彼箴言實始  
徒聞束帛之頒乃講解何功過冒奇珍之賜是微臣芻  
蕘之遇比蘊古特隆而皇上採納之深過太宗甚遠也  
臣等阿衡有職作礪無才註疏卑卑補袞慚無一字恩  
私種種許身媿比雙金敢不夙夜謨謀捐糜報稱盟心

以對共圖保泰之猷載寶而朝時被駢蕃之寵伏願以  
逸居逸雖休勿休惟危惟微惟精一以執厥中慎乃有  
位曰慈曰儉曰不敢以先天下寶惟其賢則德日以盛  
業日以昌永奠無疆之厯天不愛道地不愛寶長流至  
治之光矣臣無任瞻天仰聖激切屏營之至

策

廷對策

臣對臣聞帝王之繼天以立極也端其本以為學而後

可以立天下之治原審其要以出政而後可以弘天下之治化何者人君之學非徒以資誦說也凝神於宥密涵養於穆清固羲皇以來之道統所賴以繼之於無窮者也本之弗端則其學也為儒生口耳之學而何以造於天德之精人君之政非徒以飾文為也任君師之責為治教之宗固羲皇以來之道統所賴以行之於不替者也要之弗審則其政也為後世粉飾之政而何以臻於王道之極惟求端於本而不徒事於口耳之粗則愈

涵泳而愈充周時敏之餘皆實學也聖德所以同天而  
至治之原於此乎端矣惟致審於要而不徒事乎粉飾  
之具則愈敷施而愈恢廓推行之際皆實政也而至治  
之化於此乎成矣學以基政政以顯學道合一而不偏  
學務其本政舉其要事不勞而可舉自古帝王不出邃  
密之中而道積厥躬萬世稱至學不煩措置之力而事  
得其理萬世稱至治者此道行也况出震維新正道岸  
誕登之始繼離方早正人心望治之初可不取其所當

急者以為典學之本擇其所當先者以為立政之要也  
哉欽惟皇帝陛下弱齒含元岐嶷神授十齡出閣溫文  
日新正位宸極而玄德愈光委政耆碩而王猷益擴嘉  
納帝鑒圖說而披覽不倦一舜典堯謨之式命書四箴  
六箴而顧諟不忘一湯盤武几之銘近又渥經筵之賜  
嚴覲吏之飭蓋學已至矣政已弘矣軼於唐虞三代之  
盛矣乃猶不自滿假進臣等於廷俯賜清問首舉商周  
之訓次及漢唐宋君臣之事而終策臣等以典學立政

之要慎始篤初之規豈意臣等集先聖之術明當世之務有足以裨萬分之一者乎而臣非其人也雖然臣愚學慚稽古志切攄忠敢不披瀝罄竭以對臣聞之君者天之子也民之主也為往聖繼絕學者其道也為萬世開太平者其責也故美玉不琢則射斗之光不生寶鑑不拭則映日之輝不發聖人不學則光天之德不耀甚矣哉學之弗可已也然不曰壯而好學如日中之光少而好學如日出之陽嗣服之始學其不尤要乎家而無

政則大夫無以著浚明之勲國而無政則諸侯無以樹  
亮采之績天下而無政則天子無以布清寧之化甚矣  
哉政之不可忽也然不曰慎厥初惟厥終終以不困不  
惟厥終終以困窮嗣服之始政其不尤要乎是故臨朝  
願學臨政願治凡為哲后者皆然而始尤重也論學以  
輔德論政以輔治凡為良弼者皆然而始尤切也粵稽  
諸商太甲高宗善守成者也臣考其初則有伊尹傅說  
之誨矣人紀之修風愆之戒非伊之所為訓王者乎遜



志之益聰明之憲非說之所為詔王者乎臣言焉君行  
焉此所以終允德而靖殷邦也故終商之世而曰中興  
之令主者必推太甲高宗也載稽諸周成王亦善守成  
者也臣考其初則有周公之誨矣紹庭上下陟降厥家  
非訪落之詩所為作乎稼穡艱難政事勞瘁非無逸之  
書所為戒乎臣言焉君聽焉此所以覲耿光而揚大烈  
也故終周之世而曰繼述之賢君者必推成王也然學  
勤矣而所以典其學者有本政勤矣而所以立其政者

有要三代以後此義不明強學之主誠代有之而記誦之習興矣光武夜分講經而昧三公之體太宗歲周御覽而失兄弟之義英宗不廢講讀而暗禍階之萌顧洪業之建乃出於不事詩書之漢高此其故何也天授之資固足以創大業而惟其棄焉不學學焉無本此高之所以止於高也勵精之主誠代有之而粉飾之風盛矣始皇衡石程書何補於秦之亂文帝衛士傳餐何益於隋之亡宣宗汗服而不倦何裨於唐之衰顧致理之效

乃出於清淨無為之漢文此其故何也玄默之修固足以致治平而惟其政之不更立之無要此文之所以止於文也天啓休明生我皇上日親講幄而進學之志寒暑不忘日咨輔臣而求治之思細大不廢蓋法天行以勵學獨超於章句之外憲天道以出政深探夫理道之原即商周之主不能過之即詩書所稱何以加焉我二祖八宗之丕緒真足以揚於不墜矣顧臣伏讀聖制有曰論者謂帝王之學與韋布不同蓋不在章句間也不

知舍章句之外又何學歟又或謂主好要則百事詳所謂要者果安在歟臣有以見陛下之心望道未見之心也視民如傷之心也夫帝王之學與韋布不同此程子之言也所謂知學之本者也主好要則百事詳此荀卿之言也所謂知政之要者也是故往代之臣各執其見以陳正始之謨而往代之君亦各因其謨以裨正始之治如漢自仲舒天人三策之後有王吉變俗之論匡衡審尚之疏與夫六戒四儀之陳貢禹節儉之勸陳寵蕩

滌煩苛之議皆為當時學與政設也然而諸君之最著者不過表章六經臨雍拜老吏多循良治多聰察無他本與要不在也宋自先天元祐之間呂公著陳十事以助新政司馬光獻三劄以隆治平與夫熙寧間程顥有稽古正學定志之說皆為當時學與政設也然而諸君之最著者不過雅好儒術崇尚文學紹述有聲又安數載無他本與要不在也然則本何在手聞之上學以心下學以耳欲得其本純心之道不可不講也要何在手

聞之用人者用天下而有餘自用者為天下用而不足  
欲得其要任人之道不可不講也請因聖問之所及而  
極論之陛下終篇策臣曰爾多士習先聖之術明當世  
之務其為朕折衷衆論究其指歸典學何急立政何先  
或古今異宜創守殊軌悉茂明之以副朕慎始篤初之  
意臣愚以為人之一心操存舍亡其幾至可畏也況人  
君之心百欲攻之一念弗純欲且乘之入焉其係於學  
之進退非淺小也必也戒懼於不睹不聞之時慎獨於

莫見莫顯之頃至善為的主善為師不息不移允迪可期帝王為學之本或者其在是歟譬則水焉清之終日可見眉睫不過一撓莫辨方圓誠不可以不慎也故曰日月久照不改其明星辰久旋不改其度聖人久於其道不輟其功學至此天下之至學也非裝綴為能品藻為工矻矻終年者比也人之一身一日二日其事尚難兼也况人君之一身百責萃之一有弗任則事且因之以隳焉其係於政之得失非淺小也必也精其擇於任

用之初專其任於簡畀之後不信讒間不責細事惟和  
惟一政事乃又帝王為政之要或者具在是歟譬之御  
馬輓輒不具其何以行有其輔之一日百里誠不可以  
不審也故曰酒非麴蘖則無與成羹非鹽梅則無與和  
君非賢臣則無與治政至此天下之大政也非出納必  
躬案牘必親厘厘守法者比也此所謂典學之大本也  
立政之大要也然臣又有獻焉純心以為學而任人之  
本即存傳曰為政在人取人以身此之謂也任人以立



政而輔學之資有賴經曰朝夕納誨以輔台德此之謂也顧臣不患陛下弗純心以為學而慮聰明之太過或以為商周之主不足法而求於學之外焉不患陛下弗任人以立政而慮英敏之太過或以為商周之君不足法而求於政之外焉求於學之外則索之愈高而失之愈遠將有談正道而尚曲學如公孫弘之惑武帝矣求於政之外則更之愈急而行之愈蔽將有口堯舜而心桑孔如王安石之惑神宗矣此臣愚之過計固然而亦

豈可以弗早戒哉伏願我陛下上畏天地近法祖宗無以學至矣而驚於高遠無以政成矣而事於紛更無以深居而好逸游無以物力豐盛而事土木無以海宇昇平而事遠夷無以安處深宮而狎近習則道德高厚治化洋溢內恬外熙瑞應祥集虞夏商周不足侔矣况漢唐宋乎哉臣不識忌諱干冒天威無任戰慄隕越之至  
臣謹對

宗伯集卷一

欽定四庫全書

宗伯集卷二

明 孫繼臯 撰

疏

乞恩疏

翰林院修撰臣孫繼臯奏為比例陳情懇乞天恩俯賜  
追贈前母事臣由萬曆二年進士除授前職萬曆五年  
四月內三年考滿吏部引奏復職臣父孫臣臣母劉氏

妻曹氏俱蒙准給應得勅命臣叨沐鴻恩舉家感戴唯  
是前母劉氏實臣父結髮之妻備極艱辛遺澤未泯而  
臣祇奉令甲未敢陳乞顯揚一念耿耿難忘茲者恭遇  
皇上晉號兩宮推榮羣下臣之微願正獲斯時查得先  
年吏部稽勲司署郎中事主事等官張翀等俱以穆宗  
皇帝登極覃恩乞贈前母多蒙允給最後瀆奏紛然該  
部乃有從宜酌議之請意在防範冒濫權衡子奪夫慶  
篤於嘉禮之成曠典也恩覃於錫類之指大孝也臣之

遭遇自謂值人子可以自致之時擬於隆慶諸臣尤為  
希特而臣伏讀詔書兩京文臣有未考滿而許預給者  
有已考滿而許再給者有許移封移贈者有先已移封  
移贈而又許補給本身者臣謬荷拔擢列在侍從既幸  
躬逢盛美亦欲均沾濺澤况臣考滿在前止儼前母一  
贈揆於事體似非冒濫用是披瀝血誠冒昧上請伏望  
皇上垂憐至情特勅吏部查照前例將臣前母劉氏一  
體追贈則皇上曠蕩之恩益弘而微臣銜結之私愈切

矣臣無任激切悚懼懇祈之至

乞發推擬奏章疏

奏為銓政壅闕日甚冢臣求去益力懇乞聖明深思治  
理亟發推擬多䟽以明留賢之實以隆有道之長事臣  
惟天立君為生民主天又生賢才為人主用冢宰一官  
固人主所倚毗使澄序流品劑量注授以釐百工而熙  
庶績者也賢才進政事舉冢宰得其職而天下治矣雖  
老且病不當去賢才伏政事廢冢宰不得其職而天下

不治矣雖不老且病不得不去我祖宗朝吏部尚書若  
蹇義王翱等臣主一心操縱如志過大陞除往往非時  
召對面相評薦益信重如此即我皇上臨御寶極二十  
有四年於茲部所推擬亦何嘗不晨奏晨覽夕批夕發絕未  
嘗有停閣者有之自今尚書孫丕揚始丕揚柄事且二  
年於茲臣佐丕揚亦已一年於茲去年所推擬間依陪  
點或著另推停閣之章月不再見其積而至累數十推  
不下累數十缺不補則又自今年四五月始夫此累數

十缺者皇上其以為冗散不急之官耶而非也此累數  
十推者皇上其以為朦朧非例之擢耶而又非也臣請  
熟數之於前而皇上試垂聽焉堂官則有若北之工書  
祭酒僕少南之吏侍屬官則有若南北之郎中員外主  
事評事經歷重職則有若給事御史大吏則有若布按  
二司及府正官內者展采外者宣力大者廷推小者序  
遷此其缺可虛耶弗可虛耶惟是初推不下催請又不  
下另推又不下單推者不省耦推者亦不省起復假滿



聽降調而補者亦不省向討點陪為非次今并陪不點  
矣向疑傳旨另推者為偶左今并另推旨不得矣需次  
長安者林林株守嗟索米之良難待遷遠外者吐吐浪  
猜嘆積薪之最苦所懸一缺所淹實不止一人所傳一  
官所廢實不止一事賢愚同滯上下不交丕揚所守何  
官所任何職而令掣肘坐困如此此其心安耶弗安耶  
又有甚難緩者行取鉅典也賢良抑而弗徵慮上怠而  
下玩是民生之憂也臺省空而弗繼慮下閉而上蔽是

朝政之憂也又有甚不便者文選劇司也郎中聞升而復親事慮事泥抑見為耽權而弗敢安也未聞命而弗親事慮事壅抑見為避難而弗敢安也蓋至於是而吏部之事束手而難為扼腕而莫控矣丕揚用公忠素望特蒙簡任雖久以足疾卧邸一切缺帖猶手自標注心乎在公乃乞身則每荷溫留啓事則槩從中格任事者已徬徨去住之介而任人者又以展轉疑信之間夫使丕揚而寵利人也則可丕揚而秉德不回執塞不變人

也肯虛拘乎哉臣備員佐銓誠不忍見英主在上貞臣  
任事而曹事耗廢反至斯極用敢披瀝悃誠仰干迴照  
伏望皇上深維為政在人留賢有實悉檢今年四月以  
前推擬多疏俯賜批發擢用行取中間有未當聖心者  
不惜批示另推仍嚴勅丕揚當此國家多故之秋緊急  
用人之際勉出視事上副眷倚庶其展布四體殫竭一  
心銓政再新吏治有賴有如慰勉彌篤傳閣彌多雖諭  
之留實速之去臣未見其可也臣冒昧陳言不勝皇恐

跼蹐待命之至

乞行攀送梓宮疏

奏為古今大綱常必不可虧國家大典禮必不可缺冒  
懇聖明扶病攀送母后以光聖人大孝以慰寰海同情  
事臣於本月十五日忽禮部接出聖旨朕自閏八月初  
旬偶爾痰流注於左足動履不便今大行皇妣引發朕  
不能恭行攀送不勝哀慟著遣獻代行卿等還傳示務  
要虔潔敬慎恭誠供事欽此臣再三捧誦再三思維於

所謂痰注左足動履不便者而見聖情之萬不獲已也  
於所謂虔潔敬慎恭誠供事者而見聖心之萬不獲安  
也雖然皇上綱常之主而典禮之宗也茲舉而遂皇上  
異日必自追悔又必將追咎羣臣不言而以為朝廷無  
人臣敢先言之以無貽皇上悔可乎夫皇上下大孝聞天  
下久矣母論母后生前極天下養即初逝而成服皇上且  
奔且哭哭極哀外廷所聞也上慈謚奏冊寶登降薦獻  
威與禮稱步而過宮門而後登與外廷所見也蓋天生

大聖人其舉動不愆往往若此矣今只一攀送而以疾  
格九仞一簣臣竊為皇上惜之且皇上不出宮眷必不  
得帷而至午門神帛朝祖必且降而藉奠獻之手宮眷  
即不送其小者也神帛何帛朝祖何事莫獻使何人而  
猥令褻瀆不知母后之神靈肯於帛乎馮依否耶列聖  
在天之神靈肯於使乎降鑒否耶古人於親喪雖小物  
細故必誠必信必躬必親而今却於大處不無虧缺也  
臣又為皇上重惜之然而皇上固曰吾困於疾弗良於

行耳臣請有以進今夫禮居喪無沐浴飲酒食肉而有  
沐浴飲酒食肉者疾故也皇上誠困於痰弗良於行即  
與而出午門等門掖而成禮何弗可者親之喪達乎天  
子在所自致而已事關大綱常大典禮四海觀刑萬代  
瞻仰實在茲舉臣不勝狗馬心攄其愚忠惟皇上深思  
力行勿之有悔臣冒昧陳言無任皇恐激切待罪之至

籲救欽降六科十三道公疏

奏為歲序更新皇仁在宥懇乞聖慈姑停言官外謫嘉

與更始以隆萬世治安事先是皇上有旨發吏部降調  
兩京六科都給事十三道掌道御史餘皆罰俸臣等驟  
聞震恐妄意回天會疏請貸而皇上於吏部所開職名  
疏內御筆勾出却多至二十三人自都給事中掌道御  
史而外不啻數倍隨該閣臣某等伸救未蒙俞允夫皇  
上之處言官是罪其不言而非罪其言也是懼之使言  
而非扼之使不言也諸臣何辭臣等復何說顧其情似  
猶有可矜而其材品亦良有可惜者臣等備位大臣荷



國厚恩敢不畢其愚夫兵部之濫用霍文炳也而言官不言皇上罪之是也然而么麼武弁蹤跡詭秘諸臣容有弗聞弗聞則有所疑而弗敢遽言矣張誠之聯姻外戚倚恃壞法也而言官弗言皇上罪之是也然而老悖中官依憑城社諸臣容有弗聞弗聞則有所忌而弗敢輕言矣皇上神聖羣臣莫及見周於四海九州而弗蔽於几席法行於百司庶府而弗借於貴近一切處分悉煩聖慮臣等額手仰嘆至明則日月至斷則雷霆大聖

人所作為雖欲望下風佐末議其道無繇也獨念此二十三人者皆皇上所養育所選拔使分布臺省之班典司南北之職中間多以賢良徵敏練著者養之數十年而摧折之一旦拔之數百人而棄之一青言路甚重人材難得臣等不敢不為朝廷惜也古者孟春之月道人狗鐸於路以勸規而召諫也天子迎春於郊以布德而和令也往哲有之今胡不然仰惟獻春發祥百嘉咸暢惟茲罪謫諸臣乃獨索然鑄職級辭闕庭而去光天化日

之下曾不得與百獸駢舞二鳥比榮聖朝寬洪豈宜有  
此至御史差在遠方自有職事而無端連及南京越在  
江表安所睹記而一槩播遷政體人情尤駭觀聽伏望  
皇上大需鴻慈益恢聖度俯收成命姑停諸臣降調咸  
與維新以應時令乞惟准照初旨止將都給事中掌道  
御史調處餘曲貸免謫以安羣心嚴勅言官自今毋得  
有所附和而言有所疑忌而不言違者罪勿宥則上轉  
圜而聽下且埋輪而彈上推赤而求下且披丹而獻奸

邪屏迹政刑畢舉國家億萬年休明之治有賴矣臣等  
不勝惶恐懇切跼蹐待命之至

自陳疏

奏為遇災循省佐銓失職懇乞聖明亟賜罷黜以答天  
譴事項者清寧宮災皇上悚然降諭引咎責躬尋勅在  
廷諸臣痛加修省夫此一諭也成湯之六事不足多而  
宋景之一言不足侈矣顧臣以為修省有文有實其實  
乃在振淹抑錄廢錮汰闕葺始而汰闕葺乃在臣銓部

始而臣則職佐銓者也臣本單寒誤蒙拔擢積資史局  
代匱部僚惟是才不逮人處非其據席貳天卿而不能  
比其長以弘登進之路銜兼翰學而不能輔吾君以効  
責難之恭何補職司祇叢愆戾臣竊自忖以臣媮惰雖  
投閒置散尚羞尸祿矧厠劇曹以臣虛庸雖履順安常  
猶懼辱官矧承災譴臣分當汰臣心甚明伏望皇上特  
准罷歸別行推擇庶官與人兩重而人與政一新國之  
棄材將以次而登延朝之過舉亦以時而匡正弭災召

祥回天保命之道度不出此臣不勝惶恐跼蹐待命之至

覆鄭民部疏

題該南京戶部四川司郎中鄭材奏前事奉聖旨吏部知道欽此抄出到部送司查議又該本官奏為任滿日久曠官不寧乞賜裁定以便恪遵事奉聖旨吏部知道欽此欽遵抄出到部送司隨查部職掌兩京司屬除自告改南者北俸通理外其曾經被言調南者並無准理

通論之例止查得一欵萬曆十三年七月該本部題准  
今後南京堂上官曾經考察被劾改調者俱以後任之  
日為始另歷給由不得一槩通理若自行陳請得旨改  
調者仍許通理等因節奉聖旨依擬著實行欽此又一  
欵遷謫官員或因事註誤或建議被罪或考察降用酌  
量遷謫緣由人品高下照例推陞又查得本年五月內  
雲南按察司副使唐守欽陞任員缺該本部將南京戶  
部四川司郎中鄭材南京兵部武庫司郎中顧起淹擬

陞未奉允旨已將前缺另推訖又查得鄭材於萬曆十四年二月以山東濟南府德州德平縣知縣陞戶部廣西司主事十七年九月陞本部山西司署員外郎主事十八年五月陞雲南司署郎中事主事二十年二月實授本月具奏回籍調理二十一年四月起送到部本年五月除補戶部山西司郎中十二月內該陝西道御史宋興祖一本為時事激中虛文虛言皆屬無補懇乞聖明飭羣工修實政以裨天下國家事內論戶部右侍郎



李禎以郎中鄭材疏論待罪乞改別部以全大臣安堂屬正體統奉聖旨鄭材著調南京用欽此隨調南京戶部四川司郎中今該前因通查案呈到部看得南京戶部四川司郎中鄭材奏稱歷任已及九年要得通理兩京前後實俸赴部給由偶因報陞雲南僉事心有未服遂乞休致一節為照本部為朝廷用人計其俸并計其資而為封疆置吏度其材仍度其地向郎中鄭材之調南也非以告行以挂彈章也故歷任雖九年不得通理

於職掌所載京堂官曾經被劾改調另歷給由者而可推也然其所以調南也非以罪譴以競時事也前後俸雖三年不得久淹於職掌所載遷謫官員酌量人品照例推陞者而可推也去任尚書孫丕揚權於資俸才品之間而有雲南僉事之擬也惟是材者北產而授之遠方違其適矣抑孫尚書本善道而疑為薄處迷其指矣矧當時擬陪者顧起淹也淹亦資深而俸淺者孫尚書即有意左材而有意左淹乎若夫南京刑部員外鄒元

標其調南也以中旨非由人言其給由也方給由旋以  
請告本無成例似難概援但本官材猷素著年力正強  
豈得以歷俸自多抗章求去今差事已竣微疾已瘳合  
無令本官照舊前去供職其應否給由一節聽南京該  
部查例處分本部遇有相應員缺仍酌量陞轉則本官  
報主禔身之義庶其兩得而聖朝官人勵世之道亦兩  
不悖矣奉聖旨是

催點冢宰疏

題為冢臣再催未蒙點用懇賜早擇以昭公典事先該  
本部缺尚書臣等會官推舉南京吏部等衙門尚書等  
官蔡國珍蕭大亨衷貞吉李世達堪任前缺屢疏催請  
節奉聖旨吏部尚書員缺着從公再推堪任的幾員來  
看欽此臣等隨於本年十一月十八日復會官推舉太  
子少保戶部尚書楊俊民少保兼太子太保兵部尚書  
石星南京兵部尚書參贊機務周世選原任太子少保  
工部尚書曾同亨請旨簡用今又旬日往矣尚未蒙欽

點夫皇上之降旨再推也是所謂勞於求賢惟恐老成者俊猶有遺於所舉之外者也不即點用是所謂慎於用賢惟恐人心物論猶有間於所舉之中者也皇上之為銓衡計得人斯以勤矣臣等第宜服而候命何敢輕瀆顧冢席久虛銓政多窒頃自奉旨再推以來臣於內外員缺絕不敢推擬一人以須尚書至而柄事也而久之未下臣竊自惟念廷推至再賢無敢弗舉明旨孔嚴舉無敢弗公計兩推堪任諸臣銜名並留御前但望

皇上早賜裁擇點用批發度公典益昭而羣心咸慰其於邦治庶有總統臣叨署事不得不冒昧瀆請仰惟聖明省覽施行臣不勝恐懼懇切俟命之至

再催冢宰疏

題為仰乞聖明體陽德簡冢臣以隆至治事日者履長錫慶陽德載亨君子道長其惟茲時我皇上獨秉陽剛親調元化法天用賢亦惟茲時矧冢宰首臣邦治所托一缺三月中外喁喁日望我皇上早擇耆儻俾正銓席

以無過佚我國家亮工熙載之治不以茲時渙明旨諭  
在廷臣則何人長此代署臣前奉命會官推舉堪任吏  
部尚書若蔡國珍蕭大亨袁貞吉李世達四員其官蹟  
咸疏御前其才品無逃聖鑒第在我皇上沛然一批發  
而已冢臣用舍實邪正消長治理隆污之所關臣用敢  
不避煩瀆冒昧申請伏惟聖明垂仁速簡臣無任懼切  
皇恐待命之至

催發選郎疏

題為選郎勢難終缺冒罪懇恩俯賜裁奪事竊惟郎署  
小臣調補恒事而我皇上偶寢不報此豈若廷推大缺  
為股肱重寄不可旦暮即決者乃臣叨署事再三催請  
干瀆宸聽雖聖度如天無所譴訶臣心何安臣罪何逭  
顧臣揆之朝常察之政體選郎一官實難終缺蓋天下  
官員途有正雜俸有深淺人有賢否缺有優劣其出身  
資格考語等第冊籍開報月異歲殊每遇選除堂官不  
得親也必該司郎中檢閱的當具呈堂官而後加注擬



焉然而郎中亦不得專也必派委其司之員外郎主事分頭檢閱總而會之郎中而後呈堂而加注擬焉此一郎也其官則為朝廷用人之官也不為不要重其事則皆為吏道剔垢釐蠹之事也不為不細碎他置勿論即如昨者十月大選臣日夜惴惴慮負我皇上委署至意督同該司員外郎主事畢力拮据勉而卒役惟是一時堂司舉皆代庖拮据撐持跼蹐萬狀止緣前推驗封郎中白所知調補文選郎中員缺日久未下故至此臣目

擊茲苦用敢不避煩聒冒昧申請仰候聖明裁奪如以  
此官果難終缺即賜批發將白所知准調文選司典選  
供事則銓政有統而臣之署事亦有賴矣臣不勝冒昧  
懇祈之至

催發河南巡撫疏

奏為急缺重地撫臣懇恩速賜點用以保泰寧事臣惟  
河南為天下之中藩封獨繁物力故詘嚮者民饑相食  
聚而為亂賴我皇上捐帑賑貸以克底定頃又聞旱蝗

赤地矣其河南南陽兩府多有礦洞皇上遣官開采原  
奉旨著該撫按悉心經畫設法防護毋得推諉務保無  
虞而此兩府之間頃又開礦礦徒四集不下數萬斯豈  
良民善衆肯帖然為我用者當此災地創此重役所為  
調度彈壓建威銷萌全恃巡撫一官而前撫臣荊州土  
業奉旨養病回籍矣臣會同九卿博訪慎選推舉得堪  
任撫臣劉士忠鍾化民二員請旨點用日久未蒙批發  
夫此二臣者在劉士忠嘗巡按河南素著風采其威名

猶在列郡在鍾化民嘗賑濟河南夙嫻方畧其恩信猶在民心皇上若於此二臣內簡用一員照例請勅令其前去任事必能殫智畢力為皇上鞏此腹心者事關重地安危伏惟聖明早賜裁擇容臣等遵奉施行如猶未當聖心亦願明示作急另推庶於地方不致悞事臣不勝恐懼懇切仰祈之至

辯疏

奏為聞言省咎懇恩亟罷改委印務併分疏推擬事件

以明職掌事本月初一日臣在部辦事忽聞吏科署科  
事給事中劉道亨上疏參臣及臣屬文選司員外郎蔡  
應麟候旨兩日未下業已傳得其揭帖大畧論臣在科  
場則壞科舉法在吏部則壞銓選法而臚列應麟受賄  
不法狀甚具臣疾讀一過且駭且媿生平豈有疑行乎  
何挂人頰至此臣第當闔門待罪何敢置一吻顧名節  
臣所矜也職掌臣所守也臣不上章自理誰為陛下白  
臣寃者謹按揭帖徐泰時臣庚辰分考所舉士臣年十

八進學二十四鄉舉五年間貧而餬口不出其邑並無  
往蘇州處館董祖錫今復姓崔祖錫臣浙江乙酉所舉  
士原籍吳江久居湖州因查冒籍前監臨御史今總督  
王世揚查明回奏今都御史袁貞吉時以左布政使提  
調可問也並非姻婭臣猶記秦時後塲雄博祖錫春秋  
勁筆有無關節兩府士大夫在京師者定有公論趙南  
星往典京察號為執法既臣邪污多端顯詆不肖何置  
弗處臣修撰十三年而陞諭德庶子接憂六年而起少

詹事凡通籍二十年而得侍郎一甲人陞官如臣為遲  
當起少詹時前輔臣王錫爵歸省在里臣果求起掌院  
曷不之朝之輔臣而之家之輔臣耶錫爵能遥制耶又  
云少詹之起由鑽求其門生憶是年止有門生顧憲成  
一人再入吏部然以七月十七日命下而憲成以九月  
二十七日抵國門果門生力否耶有無請求見在四閣  
臣亦應有定評至謂臣署印以來鬻官大著臣無他材  
能不幸代庖於此危地怨府惟是朝夕惕勵奉公守法

差足自信臣如曾私親故一人甘懸首市曹毋論他措  
紳交游曾受同年同鄉書帕分文決陷屍江海皇天在  
上明神在旁擠則擠耳何至并其硜硜拙守而汙踐之  
臣死不瞑也若所參蔡應麟事情臣查金華廣州延平  
三知府寧陽潘縣丞皆在任未陞有無納賄臣不能知  
恩生吳繼善臣批候考定其有無勒賄臣亦不能知乃  
部規凡會推京堂多係堂官自行采訪推舉司官止是  
承行故陳用賓以巡撫首俸陪推顧養謙以邊材候用



陪推鍾化民以賑荒有譽陪推臣實主之應麟不得弄也凡推陞京外官司執俸單呈堂酌擬堂官親注缺帖故蔡如川劉三樂俸皆及府劉北人偶無北缺蔡南人得先擬雲南缺也戴燦陳一簡俸先後一月而陳經總督孫鑛保任雖未覆宜且留戴又紀錄故擬江西也周詩俸三年外而科目已二十年外原只擬僉事張應鳳俸可副使京糧考覈該部昨咨過前此亦未敢動也劉庭芥三年四薦而推南部以疏謫官秦劾鵬四年八

薦而推府同茲惟常調王允元劉以忠倪思益三推官之急選王需北缺劉迴本貫倪乃得贛州監生之上選單加級捱卯長行序年今見行無改此皆臣與該司擬議而行之應麟不得專也乃若趙之賓委果除官在先假文發覺在後蔣應吉陳惟一委果悞籤騰榜在先附選本依例改正在後已上臣部皆有俸單考語及臣批監生呈詞等項在案附選本取旨存科果其謬戾止應論臣果有奸私亦止應罪臣臣墮身坑塹絕意仕進應

麟亦事同甑破不望瓦全臣復何顧戀力為剖析第念  
堂司一體職守相關倘應麟受賄有跡是應麟負臣臣  
不敢庇若本臣主議而使應麟蒙辜是臣累應麟臣何  
敢自欺為此據實分疏仰千天聽伏望皇上亟將臣賜  
罷其本部印務或急簡尚書或選委各部院堂上官一  
員前來兼署臣與應麟被參情節請如道亨言下九卿  
科道官逐一公評恭聽聖明處分施行則臣名雖辱而  
臣節少明臣身雖退而臣職不淆矣臣無任隕越恐懼

待罪之至

考滿疏

奏為考滿缺官代題據實具陳恭聽明旨處分事臣直隸常州府無錫縣人由萬曆二年進士本年三月除授翰林院修撰四年某月內閣題充會典纂修官八年某月題管文官誥勅本年八月具奏給假省親吏部覆准回籍十二年五月起送赴部復除本院修撰本年七月題會典充纂修官某月題管理誥勅十四年某月題充

經筵講官本年某月九年考滿陞右春坊右諭德兼翰林院侍讀十五年二月會典成陞本坊右庶子仍兼侍讀掌管本坊印信本年九月丁父憂回籍守制十六年十月接丁母憂扣至十九年正月服闋二十年八月在籍起陞詹事府少詹事兼翰林院侍讀學士充玉牒纂修官行取來京二十一年五月赴京到任本年十二月十一日陞禮部右侍郎仍兼翰林院侍讀學士二十二年二月題充經筵講官四月題充正史副總裁官二十

三年二月改吏部右侍郎二十四年正月陞本部左侍郎兼官經筵副總裁俱照舊本年閏八月內奉旨署掌本部印信扣至本年十一月初十日連閏實歷正三品俸三十六箇月俸滿例應給由臣查得吏部見行事例九卿堂上官三年俸滿給由過部本部查理明白具題引奏其本部堂上官考滿咨送同堂代題引奏今臣備員吏部而尚書兩推尚在候旨右侍郎裴應章亦兩辭未任了馬署事代題無官又臣自念曠竅已久罪戾滋

多俸既及期分應幽黜若復蒙昧居職臣實悚仄不寧  
為此將歷俸月日其實奏聞伏候聖明降旨處分施行  
臣無任皇恐隕越待罪之至

假印冒官疏

奏為姦徒偽造假文冒選職官事本月十九日准兵部  
職方清吏司案呈奉本部送據巡捕參將姚洪等呈前  
事等因到部送司案查先奉本部送准吏部咨內稱趙  
之賓假文冒選一事已經具題參送而據所口供雕印

造文等事有孫心葵王敬南等犯至替揀替考則麻瘦人周姓者今皆聞風脫逃此輩若不緝獲正法法紀何由整頓姦徒何由屏息合咨兵部煩為密囑錦衣捕營巡緝等衙門多方搜捕必期罪人盡得庶法司得以根究嚴鞠如律按問肅清選法實在此舉等因到部已經劄行巡捕營密緝姦黨去後今據該營呈解偽造假文余杰前來合將原呈招詞相應黏送吏部參處案呈到部為此除將本犯批候聽處外合咨吏部徑自參處施



行計黏呈一紙內內開京城內外巡捕參將署都指揮  
僉事姚洪許大成等呈蒙提督衙門備奉兵部劄付准  
吏部咨文內嚴密緝訪孫心葵王敬南等犯事理到營  
劄仰各該把總緝訪去後本月十三日據把總周應龍  
袁寧呈據軍番王奉李之蕃等公同旗牌官田伏興等  
訪獲偽造部印賣選假官犯人余杰等三名到官卑職  
等隨即會同中軍官李之仁胡夢士張九德審得余杰  
供年二十九歲係福建延平府順昌縣民由吏員授冠

帶私造起選假印文書一套希圖投部冒選見今追出  
在官於二十三年二月內有同省人謝應朝以白丁托  
杰要假作南京吏部考中回籍起本省聽選印信文書  
杰不合依允遂私雕福建布政司延平府順昌縣印各  
一顆私造文書一套用印鈐蓋親付應朝得銀一百五  
十兩有在官知情吳洗挾分銀二十七兩三月內投部  
四月分選浙江杭州府臨安縣典史見今丁憂回籍又  
於本年四月內同省人廖汝魁以白丁托杰要假作南

京吏部考中回籍起本省印信文書杰不合依允糾同  
見今在法司緣事書辦江興周私雕福建布政司延平  
府順昌縣印各一顆私寫文書一套假印鈐蓋親付汝  
魁得銀一百五十兩江興周分銀四十兩汝魁隨即投  
部六月分選河南開封府沈丘縣典史見今在任又於  
本年十一月內有鄉親俞以良以聽選經歷應該二十  
八年選官托杰在部通同書辦江興周將該司冊庫封  
條潤起透開門鎖偷出選簿將俞以良姓名更移在前

敲透印文鈐蓋得銀三十兩至今二十四年八月內選  
興州中屯衛經歷見今在任又於本年六月內同省人  
李紹卿以兩考托杰要作南京吏部考中回籍起本省  
印信文書杰又不合依允遂假雕福建布政司福州府  
福清縣印各一顆私寫文書一套假印鈐蓋親付紹卿  
得銀二百兩八月分選廣平府雞澤縣典史見今在任  
又於本年八月內有浙江金華府永康縣人趙之賓以  
三考吏要改作選貢監生杰不合通同今脫逃火房黃

燦將該司冊庫封條潤起透開門鎖偷出選簿內應選  
監生王之賓洗改作趙之賓仍敲透印文鈐蓋得銀七  
十兩同夥今脫逃王繼南黃燦得銀二百兩偽造該省  
府縣假印文書親付之賓投部十月分選福建晉江縣  
主簿見今事犯刑部究問於本年九月有同省人葉茂  
晚係選貢監生托杰討吏部給假帖文杰不合依允假  
雕堂印一顆仍寫假票一張用印鈐蓋得銀十三兩親  
付茂晚見今回籍今蒙研審前情不敢隱諱等情具供

到職隨於本犯名下追出雕刀一把當官雕出吏部堂印一顆應天府印一顆及本犯起送本省府縣假印文書一套暨審吳洗知情分贓是的家人傅祥供詞相同各等因到臣據此臣隨查得本年十一月十九日先該臣部奏參姦犯趙之賓詐冒緣由節奉聖旨這詐犯著送法司嚴究欽此臣見雕印造文等犯脫逃未獲隨即移咨兵部轉行巡緝衙門去後今果緝獲余杰等一起除江興周臣已先期行中兵馬司拘同趙之賓送刑部

聽鞠外查得俞以良係吏員二十一年十一月准戶部  
咨加納外衛經歷二十四年八月選除大寧都司營州  
後屯衛咨文選簿明白序次應選李紹卿係京衛倉撥  
典二十三年二月准戶部廣東清吏司手本收選二十  
四年六月揀中選直隸廣平府雞澤縣典史該倉守支  
公文及考功司付文具皆明白似無別弊葉茂晚遍檢  
選簿並無此名無從根求其謝應朝係考功司考中一  
等雜職二十年二月除浙江杭州府臨安縣典史二十

二年七月報丁憂回籍訖廖汝魁係實辦承差十六年  
八月選除河南開封府沈丘縣典史二十一年四月陞  
代府倉大使訖已上二官原係十六二十等年陞選俱  
非臣及見在司官經手管理及查見在公文簿冊又皆  
有據但本部銓選官員惟據各衙門起送印信公文今  
姦徒余杰雕刻印信假造公文神巧難測恣橫無忌至  
於如此若非多方密緝姦惡幾於漏網至所供攀前項  
各官多與本部存貯簿冊選除年月互異顧既經攀執



恐有別情法應追究除將本部簿冊及戶部原送咨文等項封候參送辦審外理合具奏伏乞勅下法司將見獲姦徒余杰等一千人犯應同趙之賓一起一併嚴加究處其供攀俞以良等弔比公文冊簿一一詳鞠如果明白無弊不妨昭雪若係詐偽的確仍行原籍原任各該巡按御史提問如律庶法紀整肅銓政清明而任事之臣得以寡過矣臣杜門待罪方在辭印不宜陳瀆緣事屬假冒不敢稽延謹具奏聞伏候敕旨

辯辭疏

奏為辱官曠職義當引決懇恩亟罷以重銓地事臣自本月初四以來請罷者一請解印者三而俞旨不一下也據兵部咨一參奸徒余杰等事而京營巡視科臣程紹遂以為侵職為術籠橫猜曲詆推波助瀾不遺餘力臣竊自嘆臣之身待罪之身也不當辯臣所參事職守之事也不必辯顧又自念挾詐用術此小人之為而端人良士之恥也臣雖不肖叨列九列亦嘗奉教於君子

矣安可無說以處此夫使臣而果挾詐用術有意給科  
臣而緩之疏也必臣有書啓名帖而後可而臣無是也  
果托司官轉致必司官曾致堂官口語而後可而司官  
無是也非獨此而已科臣自疏固云閉門謝一切客考  
察營將至二十日申時始出公署接該營呈詞臣之疏  
固亦以二十日申時封上疏中所僉小日可覆按也臣  
疏上矣而猶欲緩科疏何為哉大凡緩人而急己者必  
其人欲飾罪者也欲攘功者也臣查余杰所攀各官典

史謝應朝係二十年選典史廖汝魁係十六年選二十一年陞二官非臣入部後事經歷俞以良今年八月選典史李紹卿今年六月選非臣署印後事且見在公文選簿及戶部原咨等項確有証據的無那改至監生葉茂晚并其姓名亦不經見非有罪可飾也臣區區愚心不過欲為衙門辯誣為此四三小官釋累非有功可攘也臣既據實奏聞以明人臣勿欺之義而於其明日遍投內閣本兵巡視科道揭帖以修同事之恭即不意臣

為恭而科道反以為怨其已悞矣吏部官言吏部事巡  
視官言巡視事臣考據得實而先言之詎為借科臣完  
畢公事而後言之詎為慢亦各言其職掌耳而詆為侵  
越為挾詐用術其已過矣夫挾詐用術臣不但乏此伎  
倆實亦無此肺腸故不得不辯也惟是臣兩遭詬辱既  
以輕朝廷羞當世之士而解印不報凡臣部推陞急選  
大選滿官引奏及一應題覆纖鉅事件無敢擅主暫皆  
停滯茲惟臣擔悞大罪臣所以愧恨憂懼仰而呼天亟

金安口人  
卷二  
願乞身以去伏望我皇上即將臣賜罷以謝人言以重銓地別選英碩使署印務庶臣獲粗保身名歸見鄉里臣之幸厚矣臣無任激切屏營待命之至

辭印疏

奏為負罪懇恩速罷臣以重印務事臣於本月初四日具疏奏為聞言省咎懇恩亟罷改委印務併分疏推擬事件以明職掌事內辯科臣劉道亨參論事情併乞將臣賜罷候旨積日未下也臣心甘席藁身比坐芒蓋高

載厚獨臣跼蹐伏念臣之不肖臣亦自知皇上不察畀以佐銓委以署印即不意尚書兩推未點而右侍郎裴應章又兩辭未任處既非據去又非情予焉支撐旦暮若厲而抨擊至矣已矣臣不獲復事陛下矣第臣身一日不可再留而臣部印務一日不可無屬以臣一日不可留之身而虛一日不可曠之部務計他日必又有以不早解印墮悞銓政罪臣者臣何辭置對也伏望我皇上速將臣賜罷庶印務有歸而臣罪少逭臣得傲息出

金史四庫全書  
卷二  
國門有餘榮矣臣無任皇恐激切待命之至

題明會議疏

奏為奉旨會推懇恩改委事臣於本月十五日伏見邸報該戶部等衙門太子少保尚書等官楊俊民等題為奉旨會議倭情事奉聖旨這會議倭情既說朝鮮當救朕念兵事重大貴圖萬全戰守方畧還須詳加計議務求停當來說樞臣既宜更換著吏部會同九卿科道官從公推舉熟練邊務堪任的五六員來看欽此臣莊



誦明綸仰窺睿筭決藩籬之至計務極周詳簡樞筦之  
重臣預求熟練煌煌聖謨已足以耀神武伐狡謀矣顧  
吏部印信尚臣署掌則會推公典應臣奉行而臣待罪  
杜門抱疴請告方當候旨敢復代庖惟是事急燃眉旨  
嚴渙汗我皇上如猶慎重冢臣未即點用伏乞於別部  
院大臣內欽委一員俾領印務遵照明旨內事理會官  
推舉臣前所上病疏另候降旨施行庶國家立見用人  
之效而臣亦少寬悞事之誅臣無任懇祈恐懼待命之

至

辭疏

奏為力懇天恩急改印務以重典制事臣於本月初四日具疏奏為聞言省咎懇恩亟罷改委印務併分疏推擬事件以明職掌事內辯科臣劉道亨參論事情併請亟將臣賜罷仍選委別部院堂上官前來代署候旨旬日未蒙批發臣自當靜聽處分夫復何言第念臣之身待罪之身也而臣之印務皇上所委署之印務也臣身

決不可復出而臣部雙月大選係祖宗二百年來大典制不可以臣暫廢查得大選在二十五日為欽定日期而前是堂司晝夜拮据剋日辦理無論閱單會單等劇務即推陞京外官具題須一日截取聽選官一日司審堂揀一日考舉監一日考三考一日急選官具題一日定二等雜職官銜一日至二十三日選訖而後二十五日有事於朝也天下聽選官鱗集輦轂無慮數百人諸緊事取辦只止旬日而印務未有所屬司官何所稟受

萬一擔悞墮廢異日且復有罪臣不早解印者臣何辭也臣心甘席藁身苦坐芒當此之時益高載厚獨臣跼踖用敢據實陳狀冒昧上請伏望我皇上急將臣所署印務暫借別部院堂上官一員前來代署供此選事臣靜聽聖明處分施行庶部務不悞臣心少安臣無任激切恐懼候命之至

辭印疏

奏為辭印久未得旨大選勢難如期請乞明示以便遵

奉事臣於本月十二等日兩疏辭印懇恩改委別部院  
堂上官前來兼署代領大選容臣靜聽處分俱候旨未  
下今去二十五日欽定選期止六日耳自來大選官員  
有缺悉取諸推陞官員具題必列堂銜用堂印臣今被  
參待罪義不得視事用印而印務未蒙改委推陞誰為  
具題推陞缺不出即欲依期大選安所藉手臣所以自  
恨自傷奈何以不肖而被言又奈何以被言故而愆祖  
宗舊章悞國家大事也臣用敢不避煩瀆三疏申請今

金史卷之三十一  
卷二  
日之事倘蒙慨賜批發速改印務晝夜督促選期猶可  
及也惟皇上命不然而欽改選期俟印務有屬另行補  
選是事之窮而政之權也亦惟皇上命統俟聖明裁示  
勅臣遵奉臣仍靜聽處分施行臣無任冒罪悚懼候命  
之至

再辭印疏

奏為大選期逼立候明旨改委印務事臣於本月十二  
日奏為力懇天恩改委印務以重典制事內乞聖明將

臣部印務改委別部院堂上官前來代署容臣靜聽處分候旨累日未蒙批發竊照雙月大選自祖宗二百餘年以來未嘗有一朝廢缺而選期在二十五日自皇上欽定以來未嘗有一選擔悞今以臣之不肖被參而使令甲少愆欽期頓改臣即身膏斧鉞何以辭於天下即今時日益促事體益逼凡前期推陞騰缺揀考急選等項諸緊務俱係堂官掌行而大選具本亦只係堂官列銜縱司官全設罔與提衡矧僅僅此二主事安所稟式

故印務遲改一日則選事遲悞一日臣心何安臣罪何底臣所以晝夜扚陘亟請解印非獨臣為違罪謀良為國事謀也伏望我皇上俯念大典必不可缺選期必不可更准將臣部印務立委別部院堂上官一員前來代署行事臣仍聽聖明處分施行庶臣挂議之身少免悞國之罰臣無任激切恐懼待命之至

辭疏

奏為哀懇天恩俯憐病苦特准休致事臣於年前陡患



庚厥病症自後眩暈時作醫藥罔效不得已於今年正月十九等日兩次具疏陳狀態恩放免俱未蒙批發夫皇上之尊天也天聽甚高臣分甚卑僉臣病可漸愈力可漸支何敢累瀆威嚴自干訶譴顧臣氣稟素弱憂患復深悒鬱之極病來若湊即今虛火炎攻脾土受尅眩暈不已繼以嘔噦行立旋轉食飲不納蓋昔之病在頭目而今且在膏肓矣醫人咸謂不免官還家靜攝者久且不治臣身不足惜臣上辜任使下隳職守朝廷亦安

用此病臣為也為此三疏呼天苦丐微命伏望聖慈垂  
仁哀憐特准休致使便調理臣所署印信俟得請後容  
臣另本請命臣庶幾幸而獲生歌咏太平祝延聖壽與  
天無極也臣無任力疾惶悚祈思之至

辭疏

奏為憂病增劇力懇天恩放歸田里事臣於本月十九  
日具奏為曠官感疾懇乞天恩早賜放免以安徽分事  
緣臣於歲前二十五日痰火陡作一仆幾絕病蓋得之

煩憂攻中邪火壯而元氣耗也漸已匝月未見痊可誠  
恐病日以深職日已廢微恩放免而疏上六日未蒙批  
發臣第當靜聽明旨敢復陳瀆第臣雖被言印務未解  
待罪五十日職守隳廢臣之憂病實本諸此今病勢益  
增醫藥罔效每一思慮起輒昏迷眩暈不省人事據牀  
倚壁僅而暫蘇夫人有急則籲天疾病則籲父母臣遘  
茲危苦而不哀鳴君父之前是上誤國事而下復誤其  
身也為此不避煩瀆瀝血申懇伏望我皇上憐臣病困

放歸田里使全微命亟簡名碩畀以印務臣未填溝壑之年皆歌咏太平之日也臣無任激切恐懼待命之至

辭疏


奏為久病瀕危遵例懇恩俯准休致事臣向緣病暈病嘔曠官尸祿於前月初十日六疏請罷概未蒙批發是時臣印未解臣憂轉煩撫枕呻吟何當解印靜攝專意醫藥幸而少瘥臣一介單寒擢第登華荷恩高厚忍不竭狗馬力終事陛下今冢臣點用矣印改署矣臣獲靜

攝親醫藥且再旬矣而命數多蹇神氣久銷前疾未祛  
變症疊見即令脾胃虛熱痰涎壅盛水穀不受肢體酸  
軟孤身旅邸十分狼狽照得令甲朝叅官註門籍三閱  
月者停俸不支有疾准致仕臣自去冬臘月避言謝事  
以迨今茲月已逾三病且非一臣數自悲念臣既遇矣  
顧不獲竟尺寸之用依聖明之君臣之恥也然臣既病  
矣顧猶縻俸給不停挂銜名不去尤臣之大恥也臣用  
敢瀝血披誠引例申請伏望我皇上憐臣謝事已久遣

病已危特准照例休致放還田里臣雖不得進而觀喜起之交猶能退而修蘆恥之節助流聖化維植士風臣之此去或少裨益臣無任悚懼哀懇待命之至

先大夫生平不敢自居於名以故諫草都焚篋中止存辭疏十八摯送疏源文得之先源孝遺篋請發推擬寬降謫二疏歿而覓得之京邸若署篆首日率屬請升儲公疏救荒疏救曹侍御典刑公疏特疏條上出閣議凡四三十通部事通行者不與

焉昔時同事者碩人人能言之業皆留中惜無從  
覓稿即其他著述亦多不存若今所刻碑銘誌傳  
之文亦源文雜得之其子若孫暨朽緘敗扇與行  
於世者耳十不存一挂遺至多拊心涕零伏惟垂  
鑒季男源文謹識



宗伯集卷一